

YANGI O‘ZBEKISTON

Ijtimoiy-siyosiy gazeta

№ 32 (1093), 2024-yil 14-fevral, chorshanba



www.yuz.uz



yuz.uznews



yuz_official



yuz.uz_news



yuz



BANK XIZMATLARINI RAQAMLASHTIRISH ORQALI ULARNING SIFATINI OSHIRISH MASALALARI KO‘RIB CHIQLDI

O‘zbekiston Respublikasi Prezidenti Shavkat Mirziyoyev 13-fevral kuni Vengriyaning eng yirik “OTP” banki boshqaruvi raisi Shandor Chanini qabul qildi.



Uchrashuvda bank-moliya sohasidagi, shu jumladan, “OTP” guruhiga davlatning “Ipoteka-bank”dagi ulushini sotish bo‘yicha bitim doirasidagi hamkorlikning ijobiy sur‘ati mamnuniyat bilan qayd etildi.

Davlatimiz rahbari bank xizmatlarini raqamlashtirish orqali ularning sifatini oshirish, kichik va oilaviy biznes uchun innovatsion va hamyonbop moliyaviy mahsulotlarni joriy qilish, xodimlarni Yevropaning eng namunalni amaliyotlariga o‘qitish muhimligini ta’kidladi.

Vengriyaning yetakchi kompaniyalari bilan, shu jumladan, Toshkent viloyatida ular uchun tashkil etilayotgan maxsus iqtisodiy zona negizida qishloq xo‘jaligi, vinohilik, irrigatsiya, kimyo, farmatsevtika va sanoatning boshqa tarmoqlarida kooperatsiyani yanada chuqurlashtirish masalalari ko‘rib chiqildi.

Shandor Chani, o‘z navbatida, Vengriya biznesi mamlakatimiz bozoridagi faoliyatini jadal kengaytirishga tayyorligini ta’kidladi.

Uchrashuv yakunida “OTP” banki boshqaruvi raisi uning faoliyatiga berilgan yuksak e’tirof hamda o‘ziga davlat mukofoti — “Do‘stlik” ordeni topshirilgani uchun O‘zbekiston yetakchisiga chuqur minnatdorlik bildirdi.

O‘ZA

JORIY YILGA MO‘LJALLANGAN STRATEGIK ISLOHOTLAR TAQDIMOT QILINDI

Prezident Shavkat Mirziyoyev 13-fevral kuni joriy yilda amalga oshirish mo‘ljallangan asosiy strategik islohotlar bo‘yicha taqdimot bilan tanishdi.

“O‘zbekiston — 2030” strategiyasida 2030-yilga borib, mamlakatimiz yalpi ichki mahsuloti hajmini 160 milliard dollarga, aholi jon boshiga daromadni 4 ming dollarga yetkazib, bu borada o‘rtachadan yuqori davlatlar qatoriga kirish maqsadi belgilangan. Buning uchun iqtisodiyotda transformatsiya jarayonlarini izchil davom ettirish, investitsiya va biznes muhitini yanada yaxshilash, qishloq xo‘jaligi yuqori qo‘shilgan qiymatni ta’minlash zarur.

Taqdimotda shu boradagi 5 ta muhim soha — transport, urbanizatsiya va shaharsozlik, tadbirkorlik, qishloq xo‘jaligi va energetikadagi islohotlar ko‘rib chiqildi.

Iqtisodiyot rivoji uchun bosh omillardan biri bu — transport imkoniyatlari. Mamlakatimiz dengiz yo‘llaridan uzoqligi sababli avia va temir yo‘llarni diversifikatsiya qilishga urg‘u berilmoqda. O‘tgan yili 6 ta aviakompaniya tashkil qilindi, 28 ta yangi samolyot olib kelindi. Samarqand xalqaro aeroportiga xususiy sektor jalb etildi.

Bu ishlarni davom ettirib, “Uzbekistan Airports” va “Uzbekistan Airways” kompaniyalari transformatsiyasini jadallashtirish, aeroportlar boshqaruvi xususiy sektorga berishni kengaytirish zarur.

Hududlarda moliyaviy xizmatlar, elektron tijorat, masofaviy ta’lim va tibbiyot tizimlari rivojlanishi uchun sifatli internet ham muhim.

Kelgusi yetti yilda yurtimizda aholisi 300 mingdan ko‘p bo‘lgan shahar va tumanlar soni hozirgi 13 tadan 28 taga yetadi. Ayrim shahar va shaharchalarning bosh rejaları yo‘qligi sababli faqat eniga kengaymoqda. Bu infratuzilma xarajatlari oshishiga va qishloq xo‘jaligi yerlari kamayishiga olib kelmoqda. Shu bois, urbanizatsiya jarayonlarini tartibga solish bo‘yicha konsepsiya va qonun ishlab chiqishga ehtiyoj bor.

Biznesga yanada qulay muhit yaratish uchun yo‘l, ichimlik suv, ta’lim, tibbiyot kabi sohalarda davlat-xususiy sheriklik qoidalarini aniq belgilash zarur. Ayni paytda tarmoq va hudud rahbarlari bilan birga bunday loyihalar dasturini ham shakllantirib borish joiz.

Davlatning ayrim funksiyalarini, jumladan, hududlarni obodonlashtirish, erkin iqtisodiy zonalmi boshqarishni xususiy sektorga berish masalasiga alohida e’tibor qaratildi.

Qishloq xo‘jaligi aholini oziq-ovqat va ish bilan ta’minlashda katta o‘rin tutadi. Lekin uning ayrim tarmoqlarida ish tartibi haliyam eskicha. Shu bois, hosildorlikni oshirish va tannarxni kamaytirish, sohaga innovatsiyalarni olib kirish bo‘yicha aniq yechimlar kerak.

Iqtisodiy o‘shish sur‘atlarini saqlab qolish uchun, eng avvalo, barqaror energiya ta’mini zarur. Bu yil jami 50 milliard dollarlik 122 ta yangi yirik investitsiya loyihalari boshlanadi. Shu bilan birga, aholi soni va korxonalar ham ko‘payib bormoqda. Yaqin yillarda energiyaga ehtiyoj kamida 1,5 barobar oshadi. Buning ustiga, ayrim tarmoqlarda energiya sarfi hamon yuqori.

Davlatimiz rahbari ushbu sohalariga oid takliflar bilan tanishib, ular bo‘yicha huquqiy asos va investorlar uchun mustahkam kafolatlar yaratish zarurligini ta’kidladi.

— 2024-yilda bozor iqtisodiyoti poydevorini qurishning barcha jarayonlarini yakunlab, 2025-yilda milliy iqtisodiyotimizni sifat jihatidan mutlaqo yangi darajaga olib chiqishimiz shart, — dedi Prezident.

Islohotlar jarayoniga mamlakatimizning barcha ilmiy-tadqiqot institutlarini jalb qilib, keng qamrovli “yo‘l xaritasi”ni tayyorlash vazifasi qo‘yildi.

O‘ZA

Buyuk o‘zbek yo‘li

TADBIRKOR MA‘NAVIYATI yangi davr talablariga javob beryaptimi?

(Ikkinchi maqola)

O‘zbekistonda uzoq yillar “Davlat — jamiyat — inson” tamoyiliga amal qilib kelindi. Ushbu tamoyil o‘z ijtimoiy-falsafiy mohiyatiga ko‘ra, insonni davlat va jamiyattan begonalashtiradi, ma‘naviyatini xiralashtiradi, uni siyosiy va iqtisodiy mexanizmning arizas bo‘lagi, oddiy elementiga aylantiradi.

Aslida esa inson, uning haq-huquqlari va baxt-saodati davlat siyosati va jamiyat hayotining eng ustuvor maqsad-muddaosi bo‘lishi lozimligi tarixda ko‘p bora isbotlangan. Keyingi yillarda jamiyatimiz hayoti va tafakkuridagi o‘zgarishlar tufayli mazkur tamoyil tariximizda birinchi marta “Inson — jamiyat — davlat” shaklidagi tayanch g‘oyaga aylandi.



Prezidentimiz “Bu siyosat bir yil bilan cheklanib qolmasligi, doimo bardavom bo‘lishi barchamizga ayon. Aslida ham, bizning eng bebaho boyligimiz, bu — bunyodkor xalqimiz, duogo‘y otanalarmiz, navqiron avlodimiz emasmi? Shu yurtida yashayotgan har bir insonning tinch va baxtli hayot kechirishi, uning

sog‘lig‘i joyida bo‘lishi, yaxshi ta’lim olishi, oilasini tebratishi uchun qanday sharoit kerak bo‘lsa, hammasini yaratib berishga harakat qilyapmiz va bu yo‘ldan aslo to‘xtamaymiz,” deya alohida ta’kidlagani esa, mazkur yo‘nalishdagi tadbirkorlikning yaqqol ifodasidir.

TADBIRKORLIK MAS‘ULIYATI

Alohida ta’kidlash joizki, “Davlat — jamiyat — inson” tamoyilining “Inson — jamiyat — davlat” tamoyiliga o‘zgartirilishi va shaxs omilining birinchi o‘ringa chiqarilishi barcha sohalar va dolzarb masalalarda nafaqat davlat va jamiyat mas‘ulligini, ayni paytda insonning ham mas‘uliyatidan xoli bo‘lmasligini anglatadi. Ya’ni davlat organlari, vazirlik va idoralar faoliyatidan qat’i nazar, ushbu yo‘nalishdagi ma‘naviy muhit va ijtimoiy makon qiyofasini tadbirkor hamda mulkdorlarning shaxsiy xislati, fazilatlarini, hayotiy pozitsiyasini, ishg va kasbiga munosabatini, vijdonini, mas‘uliyat hissi ham ko‘p jihatdan belgilaydi.

▶ Davomi 3-betda

Qishloq xo‘jaligi

BIZNI SINOVLARDAN NIMA QUTQARADI?

BUGUN ILM-FAN VA INNOVATSIYA HAR QACHONGIDAN AHAMIYATLI BO‘LIB BORMOQDA

Beruniy, Ibn Sino, Mirzo Ulug‘bek kabi ko‘plab ajdodlarimiz jahon tamadduni va ilm-fan yutuqlariga juda katta hissa qo‘shgani shu Vatan, shu yurt farzandi sifatida har birimizning qalbimizda cheksiz faxr-iftixor tuyg‘ularini uyg‘otadi.

Muhimi shundaki, genimizda yaratuvchanlik, mehnatdan qochmaslik, izlanishdek xislatlar mujassam. Shu ma’noda, jadallashib borayotgan hozirgi texnika

asrida ilm-fan yutuqlarini ishlab chiqarishga joriy etgan, o‘z ilmi va tajribasiga ishongan millatgina dunyo siyosatida, sayyoramizdagi global muammolar qar-

shisida barqaror tura oladi, desak hech mubolag‘a bo‘lmaydi.

Ayni paytda esa O‘zbekistonda Uchinchi Renessans poydevorini yaratish jarayoni kechmoqda, jamiyatimiz tub burilish arafasida turibdi. Bu, albatta, davlatimiz rahbari boshchiligidagi ilgari surilayotgan tashabbuslar samarasidir. Bugungi geosiyosiy beqaror vaziyatda hayotning o‘zi oldimizga qo‘yayotgan sinovlardan esa bizni faqatgina ilm-fan va

har bir sohaga innovatsion yondashuvlar olib chiqadi.

Hozir dunyo nufusi 8 milliardga yaqinlashib qoldi. Shu jumladan, mamlakatimizda ham aholining demografik o‘shish darajasi yildan-yilga ortib boryapti. Prognozlashtirish va makroiqtisodiy tadqiqotlar institutining ma’lumotlariga ko‘ra, 2030-yilga borib, yurtimiz aholisi 41 millondan oshadi. Albatta, bu e’tiborga molik jihat. Chunki o‘shish, o‘z navbatida, oziq-ovqatga ehtiyojni ham ko‘paytiradi.

▶ Davomi 4-betda

14-fevral - Zahiriddin Muhammad Bobur tavalludi kuni IKKI DAHO VA besh ruboiy

Zahiriddin Muhammad Bobur hazratlarining Mir Alisher Navoiy bobomizga doimo havas bilan qaragani va bu “ko‘p va xo‘b” ijod qilgan daho shoirni o‘ziga ustoz, deb bilgani ko‘pchilikka ma’lum. Shu bois, ular she’riyatida o‘xshashliklar uchrashi tabiiy, lekin bunday yaqinlikni Boburning Navoiyga taqlidi, deb talqin qilish ular she’riyatiga yuzaki, nojiddiy yondashuvdan boshqa narsa emas. Aslida esa Bobur lirikasidagi Navoiyga tatabular ikki shoirning ham o‘ziga xos musobaqasi, ham daho shogird tomonidan daho ustoz asarining tasdiq usuli orqali muayyan ma’nodagi to‘ldirilishidir. Kamina o‘shanday asarlar xususida bir necha og‘iz so‘z aytmoqchiman.

Hazrat Navoiyning ajoyib bir ruboiysi bor. Unda shakl go‘zalligi mazmun go‘zalligi bilan kim o‘zarga bahslashadi. Bu ikki go‘zallik she’rxon ko‘zi o‘ngida xuddi quyosh bilan oy munosabatlari kabi tengsiz bir maqomda namoyon bo‘ladi.



Jondin seni ko‘p sevarem, ey umri aziz, Sondin seni ko‘p sevarem, ey umri aziz. Har neniki sevmoq undin ortiq bo‘lmas, Ondin seni ko‘p sevarem, ey umri aziz.

▶ Davomi 6-betda

